

欽定剿平粵匪方略

欽定勦平粵匪方略卷一百四十八 丙辰年

三月初二日 己未 托明阿陳金綬雷以誠奏言瓜

州賊匪自東西圍移營進逼該逆屢受重創野
無可掠不敢時常出巢據難民供賊中火藥米
糧已盡勢極窮蹙惟金陵逆黨去冬竄擾瓜鎮
逼近下蜀街高資等處對岸卽係六合儀徵俱
須嚴密防堵 臣等與吉爾杭阿疊次函商添撥

水師水勇交總兵陳國泰帶赴南岸協勦並飭
北岸水陸各營嚴截賊船臣等仍東西出隊緊
攻瓜州嗣後疊據探報水師水勇協勦南岸賊
匪先後俱有斬獲臣等因賊援已近尤須急攻
瓜州破其巢穴庶外援亦聞風瓦解自二月初
以來臣托明阿親督各隊分路進攻該逆堅守
不出祇於牆內施放槍礮惟於初八日出賊數

百名專撲虹橋又有大股賊匪一千餘名護擁
續至經總兵鞠殿華會合各勇四面勦殺斃賊
二百餘名餘賊潰散各兵勇追至賊濠始行收
隊此後百計環攻賊終不出昨接吉爾杭阿來
咨高資以內嚴巷一帶之賊被攻勢蹙於十二
日焚壘夜遁與鎮江逆賊合股東下又據探十
八日上流駛來白篷賊船五十餘隻十九日又

來大船多隻俱泊金陵下關一帶並聞金陵賊
匪置火攻船十隻快船二百餘隻糧船多隻欲
遇順風先以火攻水師隨領糧快等船東下另
有十船裝載甄石柴薪欲撲浦口且於十七八
兩日出賊二千餘人由觀音門潛赴下游臣等
一面商同吉爾杭阿加意籌防一面飛飭焦山
水師速撥戰艇選派得力將弁督帶上駛協力

防勦並飭土橋觀音門等處水勇聯絡聲勢節
節應援惟陸路兵力旣單江面水師零星布置
每處祇船十餘隻實恐不堪抵禦前經向榮由
粵東咨調之紅單船臣托明阿疊次催提杳無
信息惟有仰懇

飭下浙江福建各督撫沿途提催飭令迅速入江協勦
同日翁同書奏言臣查咸豐三年四月間江忠

源奏陳軍務八條皆切中時弊洞悉賊情實爲至當不易惟於江防事宜尙未議及臣以爲此時逆賊瀕江踞守江防之要有五一曰扼要津長江自漢口而下如道士洑小孤山縱陽鎮板子磯等處險要不可勝數就蕪湖以下言之則如裕溪口浦口觀音門高資港鮎魚套土橋焦山等處均爲沿江要害皆已有水師駐守惟和

州之鍼魚嘴在西梁山之下卽古之橫江口尙
無水師駐泊故賊船得由皖省內河及巢湖出
江調安慶賊黨下援並運送糧米渡至南岸直
抵金陵城下是鍼魚嘴亟宜撥船堵截二曰聯
陸路凡江面屯泊水師之處岸上必須有陸軍
接應今惟觀音門岸上無兵若陸路派撥一軍
駐紮南岸燕子磯棲霞山一帶則觀音門水師

無孤立之虞至水陸兩路利於同時夾擊儻有
不前卽從重懲辦以儆其餘三曰斷岸奸賊匪
往來每密布奸細暗通消息浦口南岸之七里
洲等處皆爲賊匪聚集之所必應設法緝拏並
令居民遠徙庶賊匪信不能通糧無可掠四曰
議火攻自艇師上駛皆以火攻獲勝今可仍用
火攻之策使水師兵勇泅水登陸燔燒賊營尤

足令其破膽五曰增小船艇師各船過於笨重
非大風則不能行遇淺港則不能進備賊匪乘
坐划船難期追擊宜多設小船與大船相輔而
行用大船以扼截用小船以追剿庶賊船無從
竄脫臣復查近日續調粵中紅單船二十七隻
據報於上年十二月自粵起程至今尙無入江
消息俟此項船到似宜催令卽日上駛扼守金

陵上游鍼魚嘴以補塞虛斷皖省賊船由巢湖
及內河出江之路並分起先攻金山擣其中堅
俾賊匪失南北犄角之勢則瓜鎮易於勦洗儻
一時未能攻克卽催令力扼上游庶免逗留取
巧徒淹時日均奏入

上命軍機大臣傳諭托明阿陳金綬雷以誠曰瓜州逆
賊自我軍築圍進逼以後旣已野無可掠乃月來攻

勦不過小有斬獲而瓜州賊匪竄出與金陵賊黨相連已於江中洲地徧布營壘逆燄方張殊堪憤懣昨已諭令托明阿等乘該逆竄出攻取瓜州並與向榮吉爾杭阿等埽除江洲賊壘絕其南北相連著卽設法辦理毋得以該逆困守不出爲詞觀望遷延自干重咎廣東續調紅單船二十七隻本日復諭何桂清飛催前進矣再據翁同書條陳軍務請扼要津聯陸

路斷岸奸議火攻增小船等五條著托明阿等卽將該員所陳體察情形採擇辦理

上又命軍機大臣傳諭何桂清曰前據葉名琛奏續雇紅單船二十七隻於十二月初一日起程茲據托明阿奏稱疊次催提杳無音信現在瓜州一帶堵剿喫緊此項船隻由粵赴洋將及三月如已駛至浙江甯波一帶卽著何桂清嚴飭管帶船隻之護參將李新

明等趕緊駛赴江南聽候調遣毋任沿途逗留致誤
事機

初四日辛酉何桂清奏言金陵逆匪闖入龍潭等

處欲由句容丹陽內犯蘇常向樊檄令鄧紹良
馳往六里店進剿而以江長貴接統蕪湖該署
鎮卽由黃池帶勇七百名馳回防剿逆匪於正
月二十六七等日幾次衝突俱被我軍截回二

十八日復來撲營江長貴督飭官兵斬獲甚衆
惟東西梁山賊援繼至南陵大通江面又有賊
船自江北來蕪湖水陸各軍多半調赴金陵句
容各路存營兵勇究嫌單薄江長貴尙能勉力
支持向榮與臣往返函商惟有隨時察看軍情
力籌接濟並望六里店一帶迅殄妖氛鄧紹良
早日班師庶於蕪湖軍務更有起色再臣前准

江蘇撫臣吉爾杭阿函知賊匪因援應鎮江不
遂分股直趨句容希圖內犯請調浙省兵勇馳
赴句容堵截臣卽飛飭省城虎勇九百名委參
將師長鑣統帶起程嗣復接准吉爾杭阿來函
囑撥兵勇協防臣又派藍翎侍衛胡鳳鳴統帶
健勇五百名前赴鎮江聽候調遣至江西軍情
現在吉安之圍未解而臨江瑞袁三府數月以

來未復一城衢州防務緊要該處兵勇無多前
調漳泉兵勇尙無到浙日期現復咨行總兵饒
廷選臬司周起濱會同衢州鎮道就地雇募民
勇分布要隘隨時偵探江省軍情緩急妥籌防
堵奏入報

聞

初五日
壬戌
怡良奏言接准向榮吉爾杭阿來咨

聞

現在軍情緊要請調本省標兵協勦查蘇省地
廣兵單兼值防護海運出洋在在需兵本難徵
調惟賊勢狡獪未敢拘泥不得已於無可抽撥
中酌調留防上海及提鎮各標存營兵共二千
名飭令配齊軍裝器械前往江甯軍營聽候向
榮調遣奏入報

同日翁同書奏言上年托明阿等建築土圍臣
與德興阿因南北地勢不同苦口力阻始終不
從本年二月二十七日金陵鎮江悍賊萬餘合
股渡江次日約騎瓜州之賊直撲土圍由土橋
一帶越圍縱火兵丁紛紛潰走德興阿帶隊往
援托明阿親督接應力戰竟日傷亡甚多賊衆
分路抄襲處處火起各營盡燬托明阿退守三

汧河二十九日賊由樸樹灣過河德興阿帶隊
迎勦托明阿亦由三汧河回顧後路秦家橋一
帶又有大股賊匪過河圍攻參將毛三元營盤
而東岸各營亦已爲賊所燬此時揚城大震全
局已壞不敢不據實直陳伏乞

嚴飭招集潰兵暫顧目前並

飭下河臣嚴防北竄以維大局

同日文煜奏言瓜州賊匪於二月二十八日突出數千名竄至土橋將土橋烏塔溝各營盤衝踞二十九日探得托明阿等西岸營盤均被焚燬德興阿所帶馬隊尙在接仗托明阿等均退守三汊河陳金綬雷以誠毛三元各營亦被衝塌焚燒托明阿現在秦家橋揚城無兵恐難保守糧臺駐邵伯係屬鄉鎮現在賊蹤已由陸路

東竄患在肘腋臣相度機宜前路一經偏近必
應設法挪移惟有激勵團練安撫居民於沙頭
加意防堵均奏入

上命軍機大臣傳諭托明阿陳金綬雷以誠文煜曰托
明阿等圍攻瓜州師久無功軍心懈弛所築長圍本
不足恃致令賊匪合股渡江將土橋烏塔溝各營衝
踣托明阿等西岸營盤均被焚燬該大臣退守三汊

河而毛三元營盤被賊焚燒陳金綬雷以誠兩營亦被衝踞揚州軍營大局已壞該大臣等貽誤之罪殊堪痛恨現在賊勢颺張亟宜嚴防北竄托明阿等著卽收集潰兵扼要堵剿杜賊北竄之路邵伯鎮糧臺距賊甚近自應設法挪移著傳諭文煜相度情形妥爲安設此時江北事機萬分喫緊該大臣等儻不知奮勉力圖遏截賊鋒國法具在斷難倖邀寬宥現在

如何籌辦情形著隨時馳奏並知照邵燦吉爾杭阿相機截擊毋得再事遷延

上又命軍機大臣傳諭邵燦曰瓜州逆匪被圍日久突致衝出大肆鴟張托明阿等各營旣燬我軍失勢文煜恐賊氛逼近欲將糧臺移徙此時賊勢蔓延旣向運河兩岸則高郵邵伯一帶接連淮安清江勢尤可虞邵燦現權河督駐守清江亟應力籌堵禦之策徐

州擒匪未滅尤須豫防勾連本日已諭吉爾杭阿派兵由江東繞出賊前力遏北竄又令崇恩派兵前赴淮徐一帶協同攔勦其伊興額等所帶馬隊一千名亦令英桂飭調前赴淮徐交邵燦調遣清江防守兵單邵燦卽將伊興額等馬隊迎提並催提山東派撥兵勇相機調度力保淮徐卽以遏賊北竄之路

上又命軍機大臣傳諭吉爾杭阿曰瓜鎮兩處逆賊偷

越出竄焚燒托明阿等營盤兵勇多有傷亡此時大局已壞揚城震動清江一帶兵力過單北竄可虞托明阿等軍心敗散即使收拾潰卒亦難維持全局著吉爾杭阿飛速挑撥精壯兵勇派令得力大員統帶由東路過江繞山賊前遏其北竄其沿江水師各礮船亦恐托明阿等調度不及著吉爾杭阿嚴督水營將弁在瓜州江面力圖扼截毋令該逆接蹙而至其

鎮江攻勦事宜仍著布置周密毋稍疏虞

上又命軍機大臣傳諭英桂崇恩曰金陵鎮江悍賊萬餘合股渡江會合瓜州之賊直撲土圍托明阿全營兵丁大半潰散卽使收集散亡亦難復振設淮安清江一帶稍有疏虞大局何堪設想邵燦兵練爲數無多難資堵遏豫東兩省毗連江境亟應分兵應援所有伊興額等馬隊千名著英桂飭令該員等卽日統

率所部由徐州一路前赴淮揚崇恩出省防勦所謂
各路官兵諒已到齊著卽酌撥勁旅迅速馳赴清江
一帶力扼賊衝均歸邵燦調遣並確探賊情隨時馳
奏

同日略秉章奏言江西西路臨江瑞州袁州三
府所屬均已淪陷吉安府城亦正被圍劉長佑
所部兵勇二千名仍嫌單薄已抽調南北兩路

各勇先赴醴陵瀏陽邊界俟劉長佑進勦分隸
數營合成四五千之數以厚其勢嗣接探報從
九品毛英勃援勦萍鄉行至蘆溪遇賊衆數千
突至毛英勃率其弟毛英俊督勇力戰殺賊數
十嗣因路徑生疏衆寡不敵被賊四面圍裏毛
英勃毛英俊同時力竭捐軀並陣亡勇丁二十
六名幸前調之都司田興恕等到界結營楚東

橋賊始卻退卽選道劉長佑於正月十七日抵
省臣面與商酌楚軍越境須由瀏陽醴陵攻克
萍鄉萬載兩縣始可規復袁州蓋以江西西路
諸郡縣均淪於賊湖北之匪又隨時添入若祇
從一路進兵賊必悉力抗拒攻克爲難臣當札
飭瀏陽醴陵兩縣官軍歸劉長佑統領合之劉
長佑舊部楚勇及增募之勇數近五千令其馳

赴醴陵相機進剿並札飭卽選同知直隸州知
州蕭啟江等均聽劉長佑調遣以一事權劉長
佑進取萍鄉於二月初四日由黃花渡進兵初
六日行至青山鋪疊次誘賊出巢分路轟擊十
一十二兩日連獲大勝賊匪被剿窮蹙悉由袁
州大路竄去遂復萍鄉縣城統計殺斃賊匪千
餘名生擒長髮賊目四十二名奪獲軍械旗幟

不計其數其駐潯陽之蕭啟江等軍於初九日
進駐萬載縣境珠樹潭十一日袁州府城之賊
糾黨數千潛來撲營疊經蕭啟江等前後遮擊
賊匪紛紛敗潰官軍乘勢掩殺追至河岸賊匪
沿河潰逃撲水死者甚多共計斃賊千名生擒
五十二名奪獲藤牌槍矛多件其由江西義甯
州及瑞州各屬窺伺潯陽東界之賊又經團紳

黎端甫等先後堵擊殲斃甚多此次逆蹤由義甯而擾西路首逆石達開先陷瑞州次陷臨江袁州探聞吉安亦於正月二十五日被賊攻陷數郡千里之間無一官一兵相爲援應楚師出境非克復萍鄉萬載將附近各賊殲除則不能進勦袁州克復袁州後非又將附近各屬賊匪殲除則不能進勦各郡未復之處旣須客兵助

勦已復之處又須客兵代防楚師五千名雖皆
百戰之餘然越境以後兵分力單顧後瞻前動
多牽掣深恐師行濡滯有誤事機首逆石達開
悍而多詐江西風氣積柔兵勇見賊卽靡僅恃
曾國藩水陸兩軍爲之撐撐而曾國藩陸勇不
滿七千戰守俱行單薄以江西現在局勢而論
鄂城速下則羅澤南一軍可以倍道馳援固爲

上著儼堅城難以遽破而江西盼救甚殷似非
閩浙廣三省各簡銳師由該省東路南路速進
不可江西地居腹中爲東南四達之區於目前
勦賊局勢關繫非淺臣既有所見不敢不畢獻
其愚此次打仗出力員弁兵勇可否由臣覈明
彙案保獎出自

天恩其追賊陣亡之藍翎從九品毛英勃請照縣丞例

議卹六品軍功毛英俊請照把總例議卹奏入
上諭內閣曰此次湖南官軍應援江西兩路疊獲勝仗
克復萍鄉縣城實能不分畛域勦辦尙屬得手著駱
秉章迅飭帶兵員弁將萬載一路股匪次第殲除進
剿袁州以圖克復所有出力員弁兵勇著准其彙案
酌保追賊陣亡之藍翎從九品毛英勃著照縣丞例
議卹六品軍功毛英俊著照把總例議卹

同日文俊奏言臣據探吉安府城於正月二十五日失守並據臬司周玉衡之子候選同知周炎稟稱該員由韻募勇應援吉安因賊踞泰和未能衝過探知吉安府城失陷伊父周玉衡及胞兄周恩慶定已遇害請發重兵進勦保全大局等情查臬司周玉衡督率文武堅守危城屢次獲勝殺賊千餘卒至遇害情堪憫惻可否先

行

賜卹出自

聖恩其餘殉難員弁客俟確切查明另行具奏再聞逆
首石達開往來吉臨二郡先則聲言分爲三股
水陸並進撲我樟鎮營盤直犯省城又復分其
黨類屬聚泰和南窺贛境未幾永豐股匪又北
竄樂安縣之龔坊襲我隘口都司郭煥溪等迎

剿失利退守崇仁南界又准胡林翼咨稱武漢
外援賊匪被剿下竄約有五六千人由大冶行
抵興國竄入江西是北界武甯一帶賊匪愈多
實有防不勝防之勢臣與曾國藩函商目前之
計惟有飭令周鳳山堅守樟鎮堵遏吉臨陸路
之賊以道員彭玉麟督帶楚軍戰船堵禦上游
之賊並令知府劉于濱統帶水軍戰船駐紮市

漢嚴堵璫河要口捍衛省南檄遊擊趙克敦布
會同臨川縣知縣馬永熾扼守崇仁樂安兩縣
要隘以固撫建藩籬其贛郡地方尤爲水陸衝
要現亦咨行鎮道督同地方各官招集鄉團互
相策應共保無虞至此次失陷郡城臣有應得
之咎應請

旨將臣交部議處

文俊又奏言派援吉安之候補知府周汝筠前以頓兵泰和緩急失當業經摘去頂翎仍令繞道星速應援乃該員一任嚴催總以必須克復泰和縣城方可前進膠執稟復以致吉郡望救不至終被攻陷現更因賊由陸路分竄萬安興國遂撤回贛屬之大湖江地方並據贛州府稟稱周汝筠之勇半在萬安潰散應請

旨將候補知府周汝筠先行革職仍責令揀留精銳壯勇二千名折回贛郡協同該地方文武扼要環守以贖前愆奏入

上命軍機大臣傳諭曾國藩文俊曰吉安被圍日久雖在事文武竭力堅守卒以外援不至賊勢狍猖以致孤城淪陷覽奏實深憤恨撫建二府密邇寇氛情形倍爲喫重該逆又復分黨屬聚泰和南窺贛境且由

永豐竄偏樂安此時周鳳山堅扼樟鎮彭玉麟堵禦上游劉于瀘駐紮市汊皆不過以防爲勦周汝筠之勇旣因潰散回贛遮克敦布一軍亦僅能扼守崇樂要隘若不嚴飭該遊擊等節節進勦則我退而賊進其勢必更蔓延著曾國藩等仍令周汝筠遮克敦布各勇探賊所向迅速迎擊本日另諭葉名琛等揀調精兵五六千名前赴江西應援應由何處進兵著文

俊等催提前進至臬司周玉衡理問周恩慶遇害情
形著會國藩文俊確查具奏再降諭旨其闔城文武
如何下落一併查奏周玉衡之子周炎所募賴勇二
千本爲救援吉安現因賊踞泰和未能衝過亦著會
國藩等飭令隨勦隨進以期稍遏賊氛

上又命軍機大臣傳諭官文胡林翼曰楚北賊黨旣分
股回擾江境則武昌漢陽逆匪無多正當乘機進取

以擣其虛官文統師進徧漢陽已逾數月大小數十戰均有斬擒前奏水陸攻勦情形籌畫似有把握胡林翼屢獲勝仗著該大臣等激勵將士迅克兩城肅清江漢爲協勦江西之計羅澤南一軍最爲驍勇善戰前此楚疆危急經會國藩派往應援現在江省如此喫重該大臣等惟有迅圖克復武漢則羅澤南一軍即可回援江西矣

上又命軍機大臣傳諭葉名琛柏貴曰江西賊勢蔓延情形萬分喫緊必應厚集兵力以資進剿此時廣東省剿辦餘匪漸次肅清著葉名琛等卽行挑選精兵五六千名配齊軍裝器械派委得力將弁管帶兼程前赴江西聽候文俊調遣

上諭內閣曰江西吉安府城被賊攻陷所有帶兵赴援之候補知府周汝筠前抵泰和剿賊未卽往援業經

摘去頂翎茲復遲延不進著卽革職仍責令帶勇協
勦以觀後效如再不知奮勉著卽嚴叅治罪文俊到
任未久雖籌勦派援急難應手惟所屬失陷咎有應
得著交部議處該城文武員弁著查明如何下落一
併具奏

初七日
甲子托明阿奏言二月二十八日瓜州鎮

江賊匪分撲東西兩岸沿牆官兵槍礮環擊該

逆仍前衝突總兵松齡遊擊滿祿協領奇成額
等所守土橋小蘆莊等處逆賊拌死越牆而進
施放噴筒火箭將沿牆營盤焚燒步兵潰散大
半至晚收隊暫紮三汊河二十九日該逆各股
由樸樹灣等處涉水過河分撲北竄至徐家集
薛家樓一帶臣與德興阿率領馬隊官兵分路
攻擊聞瓜州逆匪又由八里堡另出一股直撲

三汊河營盤賊衆我寡東岸兵勇竟未接應勢
不可支遂撤隊固守秦家橋蔣王廟營盤並差
人赴東岸探詢陳金綬雷以誠消息因路徑不
通不知情形如何現在賊勢萬分喫緊步兵尙
未收齊惟仗馬隊分路截擊副都統德興阿落
馬受傷尙能竭力督戰臣復與該副都統相機
退剿一面嚴催各營鎮將趕緊聚集官兵迅將

各路竄賊勦除至此次曾盤失利實由臣調度
無方應請

旨將臣先行從重治罪並請將失守之總兵松齡參將
毛三元遊擊滿祿協領奇成額等一併先行革
職仍責令帶罪自效其陣亡官兵容臣查明另
行辦理

托明阿又奏言頃聞逆匪自西北分竄復有另

股由東西兩岸分路竄入揚城臣與德興阿卽帶領官兵馳往攻剿直逼城下槍箭並發殲斃賊匪五六百名生擒賊目三名長髮賊十九名並先由新集等處擒獲賊目及長髮賊三十七名據供該逆現已糾集鎮江悍賊分路北竄共有死黨數萬餘人現在官軍馬步各隊統共不足千餘名且須扼截北竄之匪實屬不敷分布

臣已飛知浦口江浦六合等處暫爲抽撥馬步
精兵一千餘名星馳來揚協勦一面札飭藩司
文煜相度地勢督帶練勇在邵伯一帶扼截水
陸要衝杜賊竄赴清淮之路奏入

上命軍機大臣傳諭德興阿翁同書曰逆匪分股竄撲
揚州復陷本日已明降諭旨將托明阿等先行革職
並授德興阿爲欽差大臣令翁同書幫辦軍務矣據

托明阿奏逆匪欲分路北竄此時清淮下游極關緊要該大臣等亟宜扼要駐紮嚴防北竄我兵自潰散後馬步兵勇數已無多著德興阿等先就現有兵勇設法堵剿務將該逆北犯之路堵扼方可徐圖攻城之策切不可專顧攻城爲賊牽掣致令高寶一路稍有疏虞本日已諭令吉爾杭阿派兵由揚州東路抄出賊前並調山東直隸陝西等處官兵赴清江交邵

燦調遣該大臣卽與吉爾杭阿邵燦會商何處扼要
卽由何處扼截總期妥爲布置以固北路藩籬陳金
綬雷以誠現在何處何以東西兩岸聲息絕不相通
著卽查明據實具奏綠營潰兵亟應趕緊招集現在
陳金綬革職何人可勝幫辦之任著德興阿於帶兵
大員中酌保一員候旨簡派

上又命軍機大臣傳諭向榮怡良吉爾杭阿曰前因瓜

州逆匪竄擾運河兩岸當經諭令吉爾杭阿派撥兵
勇渡江由東路繞出賊前截擊現在揚州失守據托
明阿奏稱訊據賊供此股賊衆不下數萬均由鎮江
等處糾合而來志在北竄清江現無重兵駐守情形
萬分喫重著怡良吉爾杭阿遵照前旨於鎮江軍營
挑選精壯兵勇派委得力大員統帶由通泰繞出賊
前嚴扼清淮一帶以杜北竄毋許稍涉遲緩並著將

派定統兵之員速行具奏至金陵鎮江沿江賊壘仍
著向榮吉爾杭阿督飭兵勇實力攻剿使該匪有所
牽制不致悉數北渡其浦口等處並著向榮等飭令
統帶師船各員嚴密防範

上又命軍機大臣傳諭桂良英桂邵燦曰賊匪竄入揚
城又欲分路北竄現在邵伯一帶兵勇單薄清江爲
水陸要衝實爲北地門戶邵燦所轄河漕弁兵爲數

無多難資堵截著桂良卽將前留長垣防堵之官兵一千八百名仍令羅玉斌管帶星速馳赴清江並著英桂將陵西前調赴豫之駐防官兵一千名一併飭令前赴清江其伊興額等所帶馬隊一千名著英桂仍遵前旨飛催前進勿任逗留各該省所調官兵到後俱著暫歸邵燦調遣

上又命軍機大臣傳諭和春福濟曰逆匪闖入揚州府

城意圖北犯是淮徐情形最爲喫重已派員撥兵在
清江一帶防堵復恐該逆由天長滁州等處直撲臨
淮與徐宿捻匪互相勾結爲害更鉅著和春福濟迅
派得力大員酌帶兵勇扼守臨淮關杜其北犯之路
該處關係甚重和春等將何員派往防堵並一切布
置情形均著卽行馳奏

上諭內閣曰托明阿等督師江北一載有餘瓜州蕞爾

一隅不能力圖攻克已屬大負委任乃此次逆匪突圍出撲由土橋一帶分股亂竄各路兵勇紛紛潰敗揚州府城復被闖入托明阿先事既不能嚴防迨逆匪撲出復不能力爲扼截雖經副都統德興阿督帶馬隊連日截殺斃賊數千而營盤連失府城復陷托明阿調度無方實堪痛恨陳金綬雷以誠以幫辦大員駐兵東岸逆匪直撲三汊河營盤並不派兵接應

現在退至何處亦未與托明阿會合均屬恇怯無能
厥咎甚重托明阿雷以誠均著先行革職陳金綬業
經革職所有三品頂戴並著先行革去聽候查辦正
白旗漢軍副都統德興阿著賞加都統銜授爲欽差
大臣並著詹事府少詹事翁同書幫辦軍務先就現
在兵勇擇要嚴扼毋令該逆擾及清淮一帶其由揚
州旁竄之路亦卽分投堵剿毋稍疏忽至失守營盤

之總兵松齡參將毛三元遊擊滿祿協領奇成額均
著卽行革職仍留德興阿軍營帶罪自效儻再不知
奮勉卽行嚴叅治罪

初八日 乙丑 曾國藩文俊奏言 臣等遵查江西地

勢以樟樹鎮爲最要現有周鳳山彭玉麟周尊
彝等水陸各軍駐紮用全力扼守樟鎮以保東
岸而衛省垣又查各路賊情金陵逆匪由湖北

入江境者以僞易王石達開爲首僞檢點賴蔭
新陷瑞州僞豫王胡以洗等陷袁州僞春官丞
相張遂謀等攻臨江吉安粵東另股土匪由湖
南茶陵等處入江境者以周培春人數爲最多
又有賊目葛耀明關志江等於瑞州臨江投入
石逆大股之中賊目王義潮劉夢熊分屯吉安
泰和亦已與石逆合併爲一石逆現回臨江分

遺賊黨攻圍贛州又有鄂省新到之賊及興國
土匪於二月初八日攻撲武甯縣該逆久踞臨
江兇悍之賊必萃於此南則窺伺贛州南安以
通兩粵之餘匪北則踞守武甯新昌以通九江
之歸路全勢注於江西意圖盡披枝葉困我省
會兇謀詭計實可痛恨查劉長佑一軍現因道
途梗塞尙無入江確信臣等擬令該員先攻袁

州俟克復後卽由分宜新喻直下與周鳳山一
軍會合以攻臨江不必先往吉安恐孤軍深入
腹背受敵再查德安縣城被賊竄踞上年臘月
有瑞昌及興國州土匪竄入該縣賊目係武甯
之葉至華興國之劉棕魁等約二千人該縣與
瑞昌毗連賊蹤去來無常春初僅贖數百人正
月全數竄出嘯聚於武甯瑞昌之間二月竄入

武甯縣境被該縣兵勇剿散初八日有湖北新到賊股合之興瑞士匪攻撲縣城至周汝筠一軍設法疏通一節查屢次搜獲僞文據稱粵東賊目王義潮統賊萬餘阻禦泰和使周汝筠之師不得進援吉安臣文俊前因其救援不力曾另調遊擊遮克敦布統率兵勇由樂安永豐一帶取道援吉詎遮克敦布起程數日卽得吉安

失陷之信臣等卽令遮克敦布扼駐樂安屏蔽撫建並令周汝筠退回贛州防守惟賊衆兵單不得不急求外援相應請

旨飭下兩廣總督廣東巡撫迅派兵勇三四千人直赴贛州會同戰守再臣曾國藩接據探報賊蹤已近撫州上游十分緊急卽於二月十八日由南康起程赴省二十日途中接彭玉麟飛稟周鳳

山連日血戰十八日與賊接仗全軍失挫若該
逆直犯省城深爲可虞臣會國藩一面單舟進
省會商守城事宜一面飛調湖口青山水陸各
軍同回省垣以固根本

會國藩文俊又奏言臣等前請調羅澤南帶兵
來江助剿先後接奉

諭旨令俟武漢克復酌量催調惟現在賊氛日熾江境

軍情萬緊而湖北武漢之賊又堅守不出我軍
日與相持城池勢難遽下與其頓兵堅城攻克
無期不如移師腹地速救江西應請

飭下湖北撫臣速令羅澤南兼程來江援剿實有裨
於大局

同日胡林翼奏言接據曾國藩函稱吉安府城
失陷江省軍情日緊急速調羅澤南李續賓提師

同援臣思首逆石達開擾害江西與粵東流匪
合併更益以本境土匪連陷江西州縣則南贛
撫建固屬可危浙閩湖南尤深遠慮東南大局
所關臣何敢以鄂中一省之事而恣然不顧羅
澤南之議則曰武漢爲南北樞紐視他省關繫
獨大上綰荆襄下控吳皖未可棄而不顧臣再
四思維南岸各軍力攻八十餘日戰士良苦遽

行撤調未免功墮垂成且羅澤南之軍虧欠正
二兩月餉項江西庫帑亦竭卽令剋日速援而
欠餉行糧必應速爲籌措臣之水師火具已齊
湖南大礮亦到默計旬日之內春汛初起漢陽
南岸嘴之沙渚可期漲溢則賊舟難於閉藏水
賊或可燒而走也臣定計力圖克復如旬日無
成則鄂省戰守惟臣無可諉責自當權其緩急

籌措餉項先以數千人赴援均奏入

上命軍機大臣傳諭官文胡林翼曰曾國藩文俊奏吉安失陷石逆久踞臨江南則窺伺贛州南安北則踞守武甯新昌賊勢蔓延全省幾徧請飭羅澤南迅速移師來江援剿本日復據胡林翼奏現在春汛初起賊舟難於閉藏已定計力圖克復儻一時未能得手先以數千人赴援等語所籌甚是胡林翼如能於旬

日之間攻克武漢則羅澤南一軍即可回援江西儘克復尙需時日先行派兵分援亦須仍由羅澤南等統帶前往方能得力該督等務當權其緩急不可稍存畛域之見致誤事機

又命軍機大臣傳諭葉名琛柏貴曰前因吉安失守當經諭令葉名琛等撥兵五六千名前赴江西聽候調遣現在逆賊石達開等糾合各路匪徒萃於江西

連陷瑞臨袁吉四郡復分遣賊衆攻圍贛州該郡爲
江右雄鎮稍有疏虞後患不可勝言惟該省賊衆兵
革實屬不敷勦辦自應亟爲籌撥著葉名琛柏貴遵
照前旨速行挑選精兵五六千名派委得力將弁統
帶剋日馳赴贛州相機堵勦該郡待援急迫葉名琛
等務須不分畛域迅速派撥毋稍遲誤

胡林翼又奏言二月初三日賊以數百人掘隄

使我兵不能及城知縣劉騰鴻督率鄉勇於隄
上迎擊賊匪敗退我兵分路追殺抄至長虹橋
賊伏突起劉騰鴻誓以死戰用礮轟之適臣中
路東路兵勇俱以大隊接應殺賊無算該逆大
敗入城連日堅閉不出初九日督臣官文約期
大舉臣與羅澤南督飭各營豫備攻城器具分
路進攻乘夜集於城下先砍其濠邊木柵二重

繼以土囊稻草填其城濠兵勇用梯登城城賊
拋擲火毬亂石繼以槍礮我勇受傷者多毫無
退志相持一時之久終莫能登臣以礮傷士卒
太多遂令暫退忽見城上之礮自裂傷賊甚多
據逃出之賊供稱是日城上之賊爲我軍礮斃
者以四五百計又因礮裂而自斃者有章姓頭
目一名我軍受傷及陣亡者亦已六百名初十

至十五等日賊匪時以數百人出城搦戰疊被
我兵抄擊下游青山窰灣一帶爲陸路接應賊
糧之道臣擬分兵扼守羅澤南等前往審視營
基見賊之大隊盡由武勝門出不下三四萬人
排列六七里之遙其前隊八九千人更番出戰
羅澤南等設伏要擊都司何紹彩亦率勇來援
追殺六七里斃賊四百餘人同知蔣益澧等駐

紫小龜山賊不能踰乃由紫金山橫出與大東門之賊會合又爲湘勇所敗二十三日賊在小龜山延燒民房大東門之賊亦來接應羅澤南等分軍擊剿賊衆大敗殲斃六七百人餘賊踰溝而逃署提臣楊載福於二月初五日率水師十營自沌口至鸚鵡洲分隊循東西兩岸而下距賊船約四五里該逆乘風上駛我軍以火攻

之賊船悉燬其南岸嘴及東岸鮎魚套之賊船
亦先後被我軍焚燒臣等水陸各軍自冬至春
幾於無日不戰現在李續賓等移紮下游審灣
羅澤南仍駐洪山臣當中路長虹橋一面至水
路之一置於武漢兩城之下外以沙洲爲護
內與陸賊相依計惟有多用火具乘風延燒趁
勢追剿或可得手目下春水方生旬日之內必

可剋期大舉聚而殲旃所有陣亡之千總彭本
餘等應請

旨飭部分別從優議卹其餘在事出力文武員弁及陣
亡受傷勇目客臣查明彙請獎卹奏入

從之

同日翁同書奏言瓜鎮賊匪越圍燬營東西兩
岸步隊同時潰散托明阿督同德興阿赴西路

迎勦陳金綬雷以誠退守沙頭幾於全局瓦解
現聞兩岸潰兵已過邵伯鎮臣卽於本月初一
日馳抵邵伯親至街市勸諭始得照常市易兵
民相安其土匪潰兵之滋事者立按軍法人心
乃定文煜因邵伯係糧臺重地亦卽馳至與臣
面商力扼北路咽喉杜賊北竄並籌給口糧軍
裝以固軍心臣一面飛札高郵等州縣截回潰

兵並飛咨河臣一律飭辦現已收集潰兵約有一千餘名妥爲安插拊循衆兵似知愧奮擬於六牖口立營扼要設防以壯聲威探聞托明阿駐紮秦家橋德興阿駐紮蔣王廟六合浦口官兵已到兵力尙單又添調步兵三百名派遊擊魁霖管帶徑赴秦家橋援應臣與文煜另派官兵由揚州北路相機協勦以期再振軍威惟邵

伯爲清淮門戶現在情形萬緊必須添兵增餉
庶不致再有疏虞正在繕摺間文煜接據委員
張士楷稟報揚城再陷知府世焜參將祥林均
已遇害其餘城內文武不知下落臣與文煜計
議除酌留收回潰兵力杜北竄外一面飛催各
營迅速齊隊赴秦家橋蔣王廟一帶會勦並函
致吉爾杭阿急攻鎮江以分賊勢

同日文煜奏言揚城被陷聞係東岸張逢春舊
勇勾結應賊以致失事本日又據委員稟報賊
在沙頭對岸豎立黃旗無數呈請添勇助剿臣
查沙頭原駐練勇本有一千四百餘名屢經托
明阿等調紮他處僅存四百餘名難資堵禦若
倉卒添募更恐來歷不明反滋事端臣體察情
形邵伯實爲水陸要地况糧臺駐紮尤未敢稍

有疏虞現聞陳金綬雷以誠均已退守沙頭兵
勇尙多或可稍資抵禦臣以糧臺事重邵伯又
爲北路要津竟有不能暫離之勢已飛飭帶勇
員弁妥爲防堵惟揚州爲東南門戶路徑處處
可通揚屬及裏下河各州縣現已全局震動釐
捐及地漕錢糧更難催納以後軍需不知如何
支持均奏入

命軍機大臣傳諭德興阿翁同書怡良吉爾杭阿曰
邵伯爲清淮門戶現經翁同書與文煜紮營六牐口
自可嚴扼北路要衝惟所集潰兵僅止千餘深恐難
資堵剿陳金綬雷以誠現已革職其所帶兵勇是否
全在沙頭地方卽著德興阿翁同書札調布置一面
力扼上游一面相機進剿其秦家橋蔣王廟兩營及
沙頭六牐兩處現存兵勇共有若干該大臣等於收

集齊全後卽行分撥防勦以期振作翁同書所請添
兵赴邵伯之處前已有旨令怡良吉爾杭阿選派大
員管帶兵勇由東路通泰等處繞出揚州之前計該
督等接奉前旨當已趕緊籌派仍著怡良等迅速催
趨前進並將派兵若干何員統帶先行馳奏其所需
餉銀著怡良吉爾杭阿於淮關江海關兩處籌備銀
二十萬兩趕緊解交文煜糧臺如一時不能湊齊卽

陸績起解毋稍缺乏揚州文武下落並著德興阿等
查明具奏

初九日
丙寅邵燦奏言瓜州賊匪竄至西岸各營

兵丁潰散勢已決裂臣卽飛飭各該地方官沿
途招集一面派員前往彈壓並設法截留酌給
盤費口糧催令迅赴六牖一帶聽候調遣刻下
該逆進踞三汊河所有各處招集之兵不過二

千餘名難期得力揚州以上惟邵伯鎮最爲險
要現在文煜已紮營駐守此外惟淮安府以下
之平橋地方水勢湍急尙可相機扼守臣又飭
道員黃錫慶酌帶兵勇馳赴該處擇要設防惟
目前情形不堪設想應請

旨飭下山東撫臣迅撥勁旅數千名委員星夜管帶赴
揚以資助勦至清淮地方兵勇無多惟有激勵

民團會合堵守以固人心奏入

上命軍機大臣傳諭崇恩曰賊匪闖入揚州清淮防禦
極爲喫緊著崇恩仍遵前旨於該省前調各路官兵
內迅速挑選精壯兵丁一千名派委得力將弁統帶
剋日馳赴清江聽候邵燦調遣毋許遲延貽誤並將
該官兵起程日期卽行馳奏

同日翁同書奏言連日截回潰兵不及二千名

因揚城東西兩路兵單未敢專顧北面急飭各營潰兵折回南路其赴東路者已調往仙女鎮其赴西路者均由揚城北面繞道循山而西歸托明阿軍營併力堵剿臣酌留官兵七百餘名分紮邵伯迤南之六牖口暨大王廟二處以杜北竄連日探報賊已占踞揚城幸前調之六合浦口馬步官兵已到托明阿親督堵剿曾有新

河灣之捷逆匪雖踞揚城時慮西路官兵追躡其後未敢乘勢北竄遊擊鄧鳳林已由江浦馳至秦家橋續調之步兵計日亦可趕到或可藉壯聲威現在地方情形萬分喫緊惟冀將潰兵陸續追回庶可添防要害如聲勢漸壯卽當呈請托明阿達選武職大員統帶由城北夾擊傷兵數無多祇可量力防堵萬不敢分兵撤防冒

昧圖功以致再有疏虞

同日文煜奏言臣連日收集逃兵一千餘名卽
籌發口糧並軍火器械已在六牘地方安營其
有已過邵伯者卽由翁同書咨行河臣並飛檄
高寶各州縣盡數截回托明阿現駐秦家橋舊
營臣趕籌餉銀商同翁同書撥兵繞道解濟至
沙頭一帶適接委員稟稱雷以誠已赴艇船沙

頭無人主持並據轉呈勇弁稟報雷以誠又將
所撤之勇撥往仙女鎮沙頭僅存本營練勇四
百餘名萬難固守懇求添勇助勦等情臣接閱
之下不勝駭異竊思邵伯爲北路咽喉揚城旣
陷自以遏賊北竄爲先陳金綬雷以誠旣退守
該處必當竭力堵勦以固裏下河門戶茲雷以
誠又退駐他處陳金綬更無確蹤沙頭地方僅

臣派往之練勇四百餘名極爲單薄實屬萬分爲難惟有嚴飭帶勇員弁激勵現存勇丁盡力扼堵

同日托明阿奏言逆賊由西北各路亂竄意圖抄截我軍經臣親督兵勇分路扼剿德興阿亦帶兵應援先後將賊匪擊敗適遊擊鄧鳳林由江浦帶兵趕到斃匪尤多賊隊遂亂退至黃家

莊一帶臣復督同德興阿追殺斃賊一千餘名
並沿路搜出奸細四名當卽訊明正法該逆因
河南賊援麴至卽奔赴三汊河一帶窩聚再臣
前與德興阿在新集等處勦賊維時陳金綬等
帶兵在東岸轟打零星餘匪迨該逆復撲陷三
汊河營盤陳金綬等近在咫尺竟未援應嗣聞
東岸各營均已焚燬並據探稱陳金綬雷以誠

均退守沙頭又有謂其退守裏下河者現在揚
州一帶路途梗阻臣已專弁繞道分赴各處探
訪囑其星速馳回至招集西岸潰散步兵現在
陸續歸隊者已及過半其暫調浦口江浦六合
等處馬隊均已迅速來揚均奏入

上命軍機大臣傳諭德興阿翁同書曰此時揚州西北
一路據托明阿奏報潰兵歸隊者已及過半其暫調

浦口等處之兵亦到西北一帶兵力稍集著德興阿
卽督飭帶兵各員實力截勦務將該逆悉數擊回勿
使分竄之賊再過北路然後力圖攻克揚城方有把
握至東北一帶兵勇過單六牘留兵僅止七百餘名
沙頭練勇又止四百餘名雖經翁同書文煜多方激
勵誠恐難期得力昨經疊降諭旨令怡良吉爾杭阿
派兵由通泰一路赴援此項官兵繞赴北面時著德

興阿翁同書相機分撥應勦應堵妥爲布置至翁同書所稱量力防堵不敢遽行分兵所見甚是但究係文員恐未能帶隊接仗著德興阿酌派得力將領一二員前赴六福交翁同書調遣至此次逆匪越牆竄出究係何人營盤先失土橋一帶各營是否陳金綬雷以誠駐兵之地西岸官兵接仗何以東岸並無一兵接應雷以誠旣退沙頭又赴艇船並將所撤之勇

撥往仙女鎮陳金綬甚至杳無確耗其退避情狀實堪痛恨著德興阿翁同書確切查明據實彙奏